

ISUMALIUTISSISSION

**Kultureqarnermut, Ilinniartitaanermut, Ilisimatusarnermut, Ilageeqarnermullu
Ataatsimiititaliap**

**Meeqqanut suli atualinngitsunut perorsaanikkut inerikkiartuutaasunik ulluunerani
neqeroorutit pillugit Inatsisartut inatsisissaattut siunnersummut isumaliutissiissutaa**

Aappassaanneerneqarneranut

Ataatsimiititaliaq suliaqarnermi ukuninnga peqataaffigineqarpoq:

Hans Aronen, (IA), Siulittaasoq

Jørgen-Ole Nyboe Nielsen (D), Siulittaasup tullia

Harald Bianco, (IA)

Ruth Heilmann, (S)

Aleqa Hammond, (S)

Ulloq 3. Oktober UKA 2012-mi suliarineqarnerata kingorna immikkoortoq ataatsimiititaliamit eqqartorneqarpoq.

Siunnersuutip imarisai siunertaalu

Siunnersuut Naalakkersuisut Meeqqanut Inuuusuttunullu Periusissiaannut tapertaliussatut suliarineqarpoq, taamatullu siunnersuut Naalakkersuisut suleqatigiinnissamik isumaqatigiissutaanni aamma Naalagaaffiit Peqatigiit meeqqat pillugit isumaqatigiissutaanni anguniagaasunut pingarnernut attuumavoq. Tamatuma saniatigut siunnersuutip 2011-mi novemberimi kommunini Namminersorlutilu Oqartussani suliaqartut assigiinngitsut isumasioqatigiinnerminni oqariartuutaasa anguniarnissaat siunertaraa, tassani ilaatigut suliat assigiinngitsut akimorlugit suleqatigiinnik pilersitsisarnissap pingaarutaa oqallisigineqarpoq. Kiisalu siunnersuut suliarineqarpoq Naalakkersuisut Ilinniartitsinermut periusissiaat aallaavigalugu, tamannalu UPA 2012-mi saqqummiunneqarpoq.

Siunnersuutip siunertaraa meeqqanut suli atualinngitsunut suliniutit eqaannerusumik aaqqissuunnissaat, ilaatigut meeqqanut inuuusuttunullu tunngasutigut qitiusumi ingerlataqartut suliniutinut aallartinneqartunut piginnittutut misigitinnissaasa pingaartuunera inissaqartillugu.

Tamatuma saniatigut siunnersuutip siunertaraa allannguinissamik pisariaqartitat piviusunngortinnissaat, taakku pineqartoq pillugu Inatsisartut peqqussutaata maanna atuuttup atuutilereerneratigut paasineqarput.

Siunnersuutitaaq matumuuna pingaartillugu qulakkeerniarpa, soorlu Meeqqanut Inuuusuttunullu Periusissiami allassimasoq, piaartumik suliniuteqarnissap meeqqanut immikkut pisariaqartitsisunut naleqqiullugu pingaaruteqaataata ersersinnissa. Tamatumuuna qularnaarniarneqarpoq meeqqat innarluutillit, allatulluunniit immikkut pisariaqartitsisut pisinnaasaasa tamarmiusut naammaginartumillu ilinniagaqaqqinnissamut piareersaataasumik atuarnissamut naleqqiullugu meeqqanut allanut naleqqiullugit sardinngisamik annertunerpaamik periarfissinnissaat.

Siunnersummi siunertarineqarpoq innarluuteqaleratarsinnaanermut sunniutigineqartussat piffissami sivisumi sunniuteqartussaagaluit imaluunniit arlaatigut piginnaasanik annikillisitinerit sardinngisamik minnerpaaffissaaniitinniarlugit. Siunertarineqarpoq sardinngisamik piaartumik meeqqat immikkut pisariaqartitsisut suliffeqarfiit akimorlugit soleqatigiissitanit paasiniarneqartarnissaat. Inuttut atugarisat pillugit aammalu inuiaqatigii aningaasaqarnerisigut piffissap ingerlanerani pissarsiaqaataasussatut una siunnersuut nalilerneqarpoq.

Taakkua saniatigut Inatsisartut peqqussutaata atuutilerneranit ilisimalerneqarsimasut pillugit siunnersuutip nalimmassarneqarnissa pisariaqarpoq.

Siunnersuutip Inatsisartuni siullermeerlugu suliarineqarnera.

Inuit Ataqatigiit

Suliffeqarfiit akimorlugit meeqqanut suli atualersimanngitsunut perorsaanermi suliniuteqarnermi nukittorsaataasutut ineriartuutaasutullu Inuit Ataqatigiinnit siunnersuut una isigineqarpoq. Inuit Ataqatigiit isumaqarput, meeqqerivitsialammik eqquassinermi aamma inuiaqatigii perorsaanermi tunngavigisatut kulturikkut pingaartitaat siuarsarneqassasut. Inuit Ataqatigiit isumaqarput, meeqqerivinni sulisut piginnaasanik annertusaalluni pikkorissartitsisarnermik suliassamik tigusinissamut piginnaannngorsarneqassasut.

Inuit Ataqatigiit Naalakkersuisut siunnersuutaannut isumaqataapput, tassa meeqqat atuarfimmi atuarnerminni misigisaqarnerlusinnaanerannut siusissukkut suliniuteqarnermi pinngitsoortinneqarsinnaammata.

Siumut

FN-ip meeqqat pilugit isumaqatigiissutaa tunngavigalugu meeqqat inuuusuttullu ikiorserneqartarnissaata qulakkeerneqarnissaa pillugu naalakkersuisut siunnersuuteqarnerannut Siumut tungaviatigut isumaqataavoq.

Kommunini sulisut ilinniarsimasut amigaatigineqarsinnaanerannik ajornartorsiutaasinnaasut aaqqiiffingineqarsinnaanerat ajornakusoorsinnaasoq Siumut isumaqarpoq. Naalakkersuisut nakkutilliilluni kommuninut tikeraartarnissamut aammalu inatsisartut inatsisaata atuutilernerani pikkorissarnerit suut pilersaarutigineqarnersut Siumumit Naalakkersuisunit akineqarnissaat ujartornrqarpoq.

Demokratit

Demokratit isumaqarput, inatsisisatut siunnersuut manna ilinniartitaanerup nukittosarneqarnissaanut alloriarneq pingaartuusoq aammalu ilinniarneq piginnaasanillu annertusaaneq inuuneq naallugu suliniutissaaneranut aqqutissaalluartut.

Demokratit isumaqarput, inatsisisaq una aqqutigalugu meeqqat ataasiakkaat qitiutinneqarnissaat pisariaqartitaallu paasilluarneqarnerulissasut, imatullu paasineqassalluni piffissaagallartillugu meeqqat ikiortariaqartut ullumikkorniit sukkanerujussuarmik ikiorserneqarsinnaalernerannik.

Atassut

Atassut isumaqarpoq illoqarfinni mikinerusuni, illoqarfinni avinngarusimasuni, nunaqarfinnilu siunnersut una malitseqartikkuminaassinnaasoq, paaqqinittarfinni amerlasuuni pissutsit ullutsinnut naleqqutinngimmata imaluunniit siunertarisanut naleqqunnatik.

Atassut isumaqarpoq, pilersaarusiornermik suliaqarnermi kommunit suleqatigineqassasut, taakkuummatami inatsisit malitinneqarnissaannut akisussaasut. Ilanngullugulu Atassut

isumaqarpoq kommuninik suleqateqarnermut ilanngunneqassasoq ulluunerani
paaqqinnittarfinni sulisut ilinniarteqqinneqarnissaannut qulakkeerinninneq.

Kattusseqatigiit Partiiat

Kattusseqatigiit Partiiata tunngaviatigut siunnersuut isumaqatigaat kissaatigalugulu børnehaveklassit meeqqat atuarfianut eqquteqqinneqarnissaat ataatsimiititaliamit eqqartorneqassasoq.

Tusarniaanermut akissutit

Piffissani marlunni siunnersuut suliamut attuumassuteqartunut tusarniutigineqarsimavoq, siullermik 26. Januarimiit 2. Martsimut aappassaannillu 5. Junimiit 10. Julimut 2012. Marloriarlugu tusarniutigineqarneranut tunngavigineqarpoq, tusarniaanermi siullermi PIP teknikikkut kukkusqarneratigut qarasaasiakkut tusarniaaneq pillugu nalunaarfigineqarsimanngimmat.

Tusarniaanermi ataasiarluni allannguinissamut tunngavissiisimavoq. Tusarniaanermut akissut pineqartoq inatsisisstatut siunnersuummut ilanngunneqarpoq.

Inatsisisstatut siunnersuutip ataatsimiititaliamit suliarineqarnera

Siunnersuutip aningaasatigut kingunissai

Siunnersummi aningaasatigut kingunissaritinneqartunut ilaapput sakkussanik iniariartortitsineq misileraanerlu, ilanngunneqassallutik nutserneqarnerat amerlisarneqarnerallu 2013-mullu 1.000.000 kr. Atorneqarnissaat naatsorsuutigineqarluni. Taakkua saniatigut aningaasartutissanut ilanngunneqassapput sakkussanik nalimmassaanerit naleqqussaanerillu kiisalu paaqqinnittarfinni sulisut pikkorissartinneqarneri, 2012-mi naatsorsuutigineqarluni 1.700.000 kr. Atorneqarnissaat.

Ataatsimiititaliap innersuussutai.

Paaqqinnittarfinni sulisut pikkorissartinneqarnissaannut atatillugu Naalakkersuisut

ataatsimiititaliamit kaammattorneqarput suliamut attuumassuteqartut, tassalu KANUKOKA aamma PIP suleqatigineqarnissaannik. Tamanna aqqutigalugu pikkorissartitsinerit imarisaat sapinngisamik amerlanerpaanut siaruartartinneqarnissaat aammalu pissarsissutigineqarnissaat anguneqassamat, tassami taakkummata inatsisisstatut siunnersuutip kivinneqarnissaanut suliassanik piviusunngortitsisussat.

Ataatsimiititaliap paasivaa, inatsisisstatut siunnersuut kommuninut naammaginartumik atuutilersinneqassappat, annertusisamik nakkutilliineq pisariaqartoq. Ataatsimiititaliap ilisimavaa, “Meeqqerivitsialak” suli aallarnisarmat aammalu suli sumiiffinni amerlasuuni atuutilersimanani. Taamaattumik Naalakkersuisut ataatsimiititaliamit kaammattorneqarput, kommuninut attaveqarnerup ingerlanneqartuarneranik eqqumafiginneqquullugit, aammalu ajornartorsiutinik nalunaarsueqquullugit kingunerisaanillu kommuninut naammassineqartussanut suliniutinullu amigaataasutut paasineqartunut aaqqiinissamut innersuussinissamik.

Inatsisisap atuutinersinneqarneratigut aallaqqaataaniit ataqqeitatigiinnermut paaseqatigiinnernullu iluaqutaasussatut ataatsimullu sunniuteqaatinut pitsaasumik kinguneqassasoq ataatsimiititaliamit isumaqarfingineqarpoq

Meeqqanut inuuusuttunullu suleriusissap atuutilersinneqarnerani anguniakkanut sapinngisamik pitsaanerpaamik sunniuteqartussatut ataatsimiititaliamit qulaani pineqartoq isigineqarpoq. Ataatsimiititaliaq inatsisisstatut siunnersuutip atuutilersinneqarnissaanut qilanaarpoq, naggataatigummi inuuusuttut amerlanerpaat ilinniagaqalersinnaaneranut iluaqutaasussaamat.

Ataatsimiititaliap isumaqatigiittup siunnersuut akuerisassanngorlugu inassutigaa.

Taamatut oqaaseqarluni aammalu isumaliutissiissummi allassimasunut paasinnilluni ataatsimiititaliap immikkoortoq aappassaanniigassanngortippaa.

Hans Aronen

Siulittaasoq

Jørgen-Ole Nyboe Nielsen

Harald Bianco

Ruth Heilmann

Aleqa Hammond